

掃葉叢書



周易注疏卷第四



勅撰

乾下

大有元亨

注云不大通何由得大有乎大有則必元亨矣



姚廣孝集

四



創于1897

商務印書館

The Commercial Press

黃苗子郁風基金會贊助

姚廣孝集 四



創于1897

商務印書館

The Commercial Press

二〇一六年·北京

【作者簡介】

姚廣孝，長洲人，元元統三年（乙亥，公元一三三五年）生，本醫家子。年十四度為僧，名道衍，字斯道。洪武中，高后馬氏喪，太祖選高僧侍諸王，宗泐舉薦道衍。燕王朱棣與語甚合，請隨至北平，主持慶壽寺。太孫建文帝立，道衍遂密諫燕王舉兵，號曰勤王。四年後，燕王立，錄功第一，拜太子少師。復其姓，復髮，賜名廣孝。永樂十六年（戊戌，公元一四一八年）三月戊寅卒，年八十四。追贈推忠輔國協謀宣力文臣、特進榮祿大夫、上柱國、榮國公，諡恭靖。姚廣孝是明初政壇一位舉足輕重的人物。

【內容簡介】

《姚廣孝集》是《中國古典數字工程叢書》——《掃葉叢書》之《萬人集》中的一部。姚廣孝現存著作有《逃虛子詩集》十卷、《逃虛類稿》五卷、《獨菴外集續稿》五卷、《道餘錄》、《淨土簡要錄》、《諸上善人詠》等，約二十餘萬字。此次新輯詩文約三萬字。另外，史證《永樂大典》和《太祖實錄》均由姚廣孝總成其事。依照錢鍾書先生為本叢書設定的規則，《永樂大典》屬類書，正文不收，而《永樂大典凡例》和《太祖實錄》應同時收入新書《姚廣孝集》和《朱棣集》。《姚廣孝集》全書近一百四十萬字，可方便讀者重新認知和研究姚廣孝其文其人。

姚廣孝集卷一百四十九

明太祖實錄卷之一百二十·洪武十一年十月

洪武十一年冬十月庚子朔

辛丑 晉相府奏請改太原府城隍之神為晉國城隍之神。詔從之。

癸卯 賜鳳陽各衛指揮。千百戶綺帛。人四疋。

丁未 享太廟。

戊申 勅諭總兵官指揮楊仲名曰。兵以衛民。必先於伐暴。三苗不遵教化。朕命爾帥師討之。昨已知兵行之期。今未知兵至何地。特遣內臣吳誠詣軍觀爾之兵。凡有方略。乘機而行。然後遣使來報。

庚戌 駙馬都尉。右柱國曹國公李貞薨。貞世居泗州盱眙縣。後徙臨淮之東鄉。性孝友。敦約謙謹。尚皇姊長公主。元季。中原鼎沸。貞見里人有廣其田宅。厚自封殖者。輒嘆曰。此何時也。乃欲為富家翁耶。遂捐家資。椎牛豕。具酒食。會鄉里約。守望相助。居無何。亂兵入境。時淮東猶為元守。貞因挈家避地淮東。久之。聞上在滁陽。乃携其幼子文忠西奔。出入亂兵中。草食露宿。幾不能存活。日夜籲天。冀保完父子。逾一月。始達滁陽見上。時甲午冬十有二月也。上見之大喜。衣服供具之甚厚。貞父子自慶幸曰。吾與汝脫離禍亂。得至於此。可謂再生矣。況又得所依恩幸之厚。其何以報。文忠時年十六。沉毅有智勇。上甚愛之。曰。吾甥猶吾子也。教養之備至。命從征討。歲戊戌。

天兵下嚴衢婺處諸郡。命文忠開闔于嚴州。以經略郡縣之未附者。貞自金陵往就養。乙巳。張士誠遣其部將由烏石山犯嚴州及諸暨。經兩月不解。嚴人大恐。貞心不自安。乃權掌軍務。令文忠引兵擊敗之。六日而還。人賴以安。丙午。上大發兵。平兩浙。命文忠以所部兵水陸並進。取杭州。貞復權掌軍務。兵出桐廬。俘其守關之卒。送居嚴州。俘卒至嚴。見城中勁兵悉出。陰有叛志。貞覺之。因饗其眾。至醉悉擒之。械送于京師。上甚喜。文忠兵所向。無弗下者。杭州平。留文忠鎮守。貞復來就養。又明年為洪武元年。上即皇帝位。封貞為恩親侯。初貞將避兵淮東而皇姊薨。權厝里中。及是。上念之不已。追封為孝親公主。勅有司其喪禮還葬于先隴。貞時在杭。上思見貞形於夢寐。時遣中使問起居。三年。上欲朝夕見貞。賜第於內城西偏。召貞就第。加特進榮祿大夫。駙馬都尉。右柱國。曹國公。追封孝親公主曹國長公主。貞年近七十。既就第。勅免常朝。贊拜不名。上幸其第。錫宴。皇太子暨諸王亦常往存問。貞跼蹐不自安。但以手拊心曰。恩義深重。言莫能報。是時北方既平。餘眾遁走沙漠。五年。上命將出師殄之。授文忠征虜左副將軍以行。師出嶺逾五月。捷音未至。上頗以為憂。召貞入便殿諭意。貞進曰。天生聖人承中華之運。陛下洪福齊天。海內盡歸職方。彼元氏區區餘孽。假息沙漠。不足憂也。捷音行且至矣。願勿勞聖慮。未幾。文忠果奏凱而還。車駕復幸貞第。錫宴懽甚。貞以表謝。并辭祿賜。表曰。臣伏蒙聖恩。以孝親公主之親寵賜府第。自揆何能。叨榮至此。臣生長田疇。服勤稼穡。惟知食力。何望顯融。初年特蒙仁祖皇帝不以臣之庸愚。俾居子壻之列。久在侍下。撫教之恩。思之無窮。報之罔極。繼而中原兵起。室家無存。獨携幼子避難他方。寄

跡於豺狼之區。奔走於荊棘之地。命危朝露。豈意生全。欽惟陛下興師仗義。應天順人。握乾符而興帝業。奮神武而拯黔黎。四海歸心。群雄率服。臣之父子幸遇聖明。脫塗泥於衽席。濟垂絕而更生。收養掖庭。待以肺腑。臣之幼子文忠。蒙然童穉。承再造之恩。扶樹教育。俾成立。指授神筭。鎮守邊陲。未效纖毫。以裨聖治。是猶螢爝之光依於日月。蚊蚋之響附於雷霆。以致武功之成。亦預分封之例。祿食一品。位列上公。下至愚駭小孫景隆。亦叨職於侍衛。衣冠焜耀於三世。恩澤滂沛於一門。揆今食祿之家。未有過於臣者。緬思往時之艱苦。豈思今日之榮華。尺寸絲毫。莫非帝力。陛下憐臣之老。賜以免朝。憫臣之愚。待以殊禮。屢蒙車駕之幸臨。時沐皇儲之眷顧。寵錫每頒於天府。爵祿復厚於子孫。恩意之隆。言辭莫罄。方今朝廷清明。法度具舉。官不虛設。祿無倖食。臣每存知足之戒。恒切盈滿之懼。臣之俸祿在所當辭。伏望聖聰俯察微忱。准臣所請。庶幾情悃之獲伸。稍追素餐之深愧。臣自憐衰邁。補報無由。伏願陛下壽同天地。宗社尊安。裕綿福祚之長。永樂太平之治。蓋貞以國家為念。子雖在側。有晨昏之奉。不以為喜。或奉命征伐四方。久勞于外。亦不以為憂。其篤於忠誠如此。是年春三月。文忠扈從秦王。晉王之國。至六月還。僅五日。貞得疾。忽不能言。上聞大驚。即幸其第問疾。上執貞手問曰。還識朕否。貞仰哭以對。上洒泣嗚咽不能止。有頃。上還宮中。使相繼問遺。至是薨。年七十有六。上震悼。輟視朝三日。車駕臨奠。追封隴西王。謚恭獻。十有二月庚申。葬于盱眙縣靈跡鄉斗光山之原。從長公主兆。發引之日。車駕復往。望哭於西城樓。長公主性至孝。未下嫁時事父母善承旨意。甚鍾愛。既嫁。助貞治家。尤極勤儉。事舅姑恭順。

好修善行。平居鮮食葷肉。夜則禮北辰。日以爲常。前貞二十八年薨。臨薨之時。神識不亂。端坐而逝。貞繼配陳氏。封淑德夫人。貞篤於孝敬太夫人。性嚴貞。微忤其意。輒加叱責。貞嘗侍食。值太夫人怒投其食器於地。貞徐拾之。食如初。恭敬愈至。有弟四人。父既沒。求分財異居。貞語之曰。父沒而母在。苟分財異居。老母得無不可於意乎。先人田廬俱候老母百歲後。隨所欲取之。吾不較也。諸弟皆愧服。及貴顯。姻族有流遇外方者。必請于上而收之。嘗言人之生世。貧賤富貴當不改所守。一旦富貴而忘貧賤。君子不爲也。平生衣取適體。食惟適口。上不時賜衣。弊必緝之。雖一帶弊。亦必藏以待用。或奉養太豐。輒不自安。召子孫集於前。懇懇言未遇時事以曉之。曰。吾家素涼薄。叨沐上恩。以至於此。雖日日美食盛饌。何患不繼。然奢靡之事。吾性所不喜也。今上方以勤儉化天下。吾爲戚里之長。苟爲奢靡。何以勸率家人。汝曹念之。其儉約蓋本於所性云。

癸丑 命龍驤衛指揮使蕭成爲陝西都指揮使。山西指揮同知王約爲山西都指揮使。

乙卯 以梅殷爲駙馬都尉。尚第二皇女寧國公主。殷。汝南侯思祖兄子也。

丙辰 開封府蘭陽縣言河決傷稼。詔免其租。

戊午 改驍騎左衛爲府軍後衛。

○夜太陰犯南斗。

○占城國王阿答阿者遣使上表。貢方物及良馬。謝璽書及上尊文綺之賜也。上復詔。賜其王金織文綺。紗羅衣各一襲。

○改武德衛為府軍前衛。

○以蘄水。羅田二縣隸黃州府。

癸亥 以前戶部侍郎程昭為寧國府知府。

甲子 改興武衛為武德衛。

乙丑 播州宣慰使楊鑑獻馬。賜文綺襲衣。

○是月。命陝西布政使司轉運本處倉糧一十二萬石于寧夏。河州。

○大祀殿成。初郊祀之制。冬至祭天於圜丘。在鍾山之陽。夏至祭地於方丘。在鍾山之陰。至是即圜丘舊址建大祀殿十二楹。中四楹。飾以金。餘飾三采。正中作石臺。設上帝。皇祇神座于其上。每歲正月中旬擇日合祭。上具冕服行禮。奉仁祖淳皇帝配享殿中。殿前為東西廡三十二楹。正南為大祀門六楹。接以步廊。與殿廡通。殿後為庫六楹。以貯神御之物。名曰天庫。皆覆以黃琉璃瓦。設廚庫於殿東少北。設宰牲亭并於廚東。又少北皆以步廊通道。殿兩廡後繚以周牆。至南為石門三洞。以達大祀門內。謂之內壇。外周垣九里三十步。石門三洞南為甬道三。中曰神道。左曰御道。右曰王道。道之兩旁稍低為從官之道。齋宮在外垣內之西南。東向。於是勅太常曰。近命三公率工部役梓人於京城之南。創大祀殿以合祀皇天后土。冬十月告功已成。特命禮部去前代之祭。期以歲止一祀。古人祀天於南郊。蓋以義起耳。故曰。南郊祀天。以其陽生之月。北郊祭地。以其陰生之月。孰不知至陽祭之於陰月。至陰祭之於陽月。於理可疑。且掃地而祭。其來甚遠。蓋言祀地尚實而不尚華。後世執古而

不變。遂使天地之享反不己人之享。若使人之享亦執古而不變。則當汙尊而抔飲。茹毛而飲血。巢居而穴處也。以今言之世。果可行乎。斯必不然也。今命太常每歲合祭天地於春首正三陽交泰之時。人事之始也。其後大祀殿復易以青琉璃瓦云。

○山西邊將遣人送所獲故元平章完者不花至京師。完者不花者。故元丞相驢兒部屬也。上遣使歸之於驢兒。且以璽書諭之曰。十一年六月至九月。三遣使北行。兩為弔祭。一為致禮於卿。既而使者俱不返。存亡不可知。乃者邊將以卿部屬平章完者不花送京師。朕怒邊將。以為方遣使通好。乃執其平章。豈不失信於卿。今特遣內臣送之抵丞相營。宥之。罪之。放逐之。卿自為區處。

姚廣孝集卷一百五十

明太祖實錄卷之一百二十一·洪武十一年十一月至十二月

洪武十一年十一月庚午朔 召寧國府知府涂節為通政使。

○置寧化守禦千戶所。初山西既平。唯靖樂縣餘孽四大王遁入蘆芽山。數出寇掠。為居民患。六年。千戶唐誠吉率兵於同瓦溝橡坊山捕其黨哈刺張送京師。斬之。至是復於寧化鎮築城。設千戶所。為捕滅之計。

○思南宣慰使田大雅以襲職。奉表謝恩。并獻方物良馬。命以文綺及鈔賜之。

○總兵官辰州衛指揮楊仲名討破五開叛蠻。捷奏至京。上遣使齎勅諭之曰。三苗不仁。自古帝王多撫之。而終不遵化。是以累世為良民患。今年。朕遣爾率兵進討。果有韜略。十一月一日飛捷至京。朕甚為之喜。聞諸蠻既平。獨吳面兒遠遁谿洞。人事異宜。險阻異勢。不必窮追。彼惡稔貫盈。自將夷滅。是命內臣尚履奉御呂玉詣軍。觀兵閱勝。爾其盡心撫綏。以副朕意。

○時西番屢寇邊。命西平侯沐英為征西將軍。率都督僉事藍玉。王弼將京衛及河南。陝西。山西馬步官軍征之。上自為文。告祭嶽瀆。山川。旗纛諸神曰。曩者兵爭日久。老幼顛連。少壯奔逼。其苦甚矣。當是時賢愚思治。上感昊穹。上帝好生。於是命予平禍亂。育烝黎。顧惟無能。實賴神佑。今者禍亂已平十有一年矣。惟西戎密邇邊陲。歲常肆侮。特命西平侯沐英。都督僉事藍玉。王弼等率兵致討。惟神有靈。尚克相之。

甲戌 占城國王阿答阿者遣使寶祿圭照婆郎等貢象馬及茄南木香。詔賜國王織金文綺。使者文綺。衣服。鈔有差。

丁丑 賜貴州宣慰靄翠。今筑安撫使密定。普定府知府安瓚錦。人二疋。金龍文綺人二疋。

戊寅 大同白洋鎮巡檢張文煥嘗出巡邏。猝與胡兵遇于焦山。戰沒。其妻聞文煥沒。亦同日死。一子窮乏不能自存。值天寒凍。十指俱墮。有司以聞。上命取至京師。令人視養。給其父俸以贍之。三年之後。月給米一石。以終其身。

○皇第五孫允熈生。皇太子第三子也。

○開封府封丘縣言河溢。傷稼。命免今年田租。

癸未 置太原左獲衛指揮使司。

○夜月食。

乙酉 平涼府華亭縣言霜蝗害稼。詔免今年田租。

○賜京衛軍士征西番者五千四百八十人絹。人二疋。

庚寅 皇太子妃常氏薨。上素服。輟朝三日。中宮素服哀臨。皇太子服齊衰。葬畢。焚於墓所。常服還內。皇孫服斬衰。置靈座傍。遇祭奠則服之。諸王公主服如制。

壬辰 臨江侯陳德卒。德。鳳陽人。初見上於定遠。歲甲午從攻全椒滁州。授萬戶。乙未克和州。從渡江。克太平。丙申破元中丞蠻子海牙水寨。定金陵。取鎮江。陞都先鋒。克溧水。常州。寧國等

處。陞帳前先鋒。十大元帥。戊戌取浙東婺州。己亥攻紹興。庚子取福安。辛丑援長興。卻張士誠軍。壬寅從征湖州天目山城羅家寨。癸卯從征安豐。追擊張士誠軍。敗之。復從上戰鄱陽湖。擒水寨姚平章。甲辰克武昌。丙午取高郵淮泗。陞天策衛指揮使。征浙西。克湖州。吳元年克嘉興蘇州。進定國上將軍。陞僉大都督府事。從大將軍徐達征山東。洪武元年克汴梁。奉詔由開封。河南渡河。取懷慶。澤潞。平陽。太原。大同。二年會大將軍克陝西。取慶陽。克羅山寨。被召還汴。三年征定西。敗王保保兵。克興元。還朝京師。十一月賜號開國輔運推誠宣力武臣。階榮祿大夫。勳柱國。同知大都督府事。封臨江侯。賜鐵券。四年詔領河南兵征蜀。敗夏將吳太尉於龍泉。破漢州。入成都。下重慶。保寧。蜀平。復還汴。五年為左副將軍。同宋國公馮勝征甘肅。尋召還視師關陝。六年征察罕腦兒。七年征北平視師。八年還京。尋又命視師濟寧。九年出鎮北平。十年還京。賜告歸鳳陽。至是卒。訃聞。輟朝三日。追封杞國公。謚定襄。

甲午 賜河南操練。征西番軍士一萬七千八百三十三人。鈔四萬五千二十六錠。
丙申 賜征西番將校鈔一萬六千三百六十三錠。

○是月。蘇州府知府李亨丁繼母憂。居鄉里。上遣使賜米鈔。勅曰。朕思自古創業之君。必由群英而興。賢能而治。爾李亨曩為郡長。恪勤廉謹。以奉憲章。雖古稱循良。不是過也。自居憂以來。朕未嘗忘。恐爾窘於日給。特遣人賜米五十石。鈔二十錠。爾其領之。體朕至意。

○陝西土魯于保安驛丞宗失加及刺哥美吉站黑韃韃叛。掠驛馬而去。守禦千戶李德率兵追及。斬之。

十二月己亥朔

庚子 給賜青州等十二衛軍士布鈔綿花。

辛丑 太白犯壘壁陣。

○上以蘇松嘉杭湖五府之民屢被水災。艱於衣食。命悉罷五府河泊所。免其稅課。以其利與民。今歲魚課未入徵者。亦免之。

○復置興武衛親軍指揮使司。

癸卯 復以署刑部侍郎沈立本為尚書。

○給賜陝西布政司屬府人民食鹽。

丁未 溢亨國王麻哈刺惹答饒遣其臣淡罔麻都等奉金表。貢番奴六人。胡椒二千斤。蘇木四千斤及檀乳腦諸香藥。百花國王刺丁刺者望沙亦遣其臣八智亞壇等奉金表。貢白鹿。紅猴。龜筒。玳瑁。孔雀。鸚鵡。哇哇倒掛及胡椒。香蠟等物。詔賜二國王及使者金織文綺。紗羅衣服有差。

庚戌 辰星犯南斗。

辛亥 暹羅斛國遣使入貢。

○置崇山衛於湖廣孟洞之地。

壬子 以左通政李允為廣西布政使司右參政。陞通政使司知事方鼎為左參議。

癸丑 以大都督府掌判官傅奎為廣西布政使司左參政。

甲寅 致仕翰林學士承旨宋濂來朝。勅勞之曰。臣之事君。宜虔恭不怠。其得休官於家者。古今幾人。卿膺永壽。精力愈加。自致仕之後。每歲來朝。甚慰朕心。朕不忍卿驅馳千里而來已。勅禮部賜廩米酒肴。爾其享之。以育高年。

乙卯 衍聖公孔希學來朝。勅勞之曰。卿家名昭于歷代。富貴不朽。永彰于天地之間。蓋由爾祖明彝倫之精微。表萬世之綱常。陰隲之重故也。卿豈不常思爾祖之德。以自致力於忠孝哉。聞卿來朝。已勅中書下禮部給送廩餼。卿其領之。

丙辰 以吏部尚書李煥文為四川布政使司。左參政刑部郎中秦中為右參政。

丁巳 以京城東門為鍾阜門。

○朵甘烏思藏灌頂國師答力麻巴刺遣使進表。貢方物。詔賜文綺繒帛。

戊午 兵部奏市馬之數。秦河二州及慶遠。順龍茶鹽馬司所易馬六百八十六匹。

○賜山西都司并三護衛所將校綺帛有差。凡將校一千七十四人。綺帛二千六百七十四疋。

○改金吾前衛為羽林左衛。羽林左衛為金吾前衛。

○使暹羅斛國將士三百一十一人還京師。賜鈔一千五百六十一錠。

戊辰 享太廟。

○是月。遣僧宗泐等使西域。

○賜前廣西布政使臧哲米鈔。勅曰。卿曩職桂林歲月未久。雖有酒失而廉介自持。邇以母憂去職。守

服至今。朕嘗軫念。特遣人賜卿米六十石。鈔二十五錠。以給所乏。卿當恪恭以孝。服闋來朝。共圖至治。哲。青州諸城人。以儒士舉。授禮部主事。轉兵馬指揮。發奸擿伏。不避權豪。上嘗賜白金二錠。馬一匹。尋陞四川左參政。未幾。陞廣西布政使。以母喪去官。自後凡官以父母喪去官而家居者。皆有賜焉。

○遣高麗使還。以勅諭之曰。汝承姦臣之詐。不得已而來誑我。今命爾歸。當以朕意言於首禍之人曰。爾殺中國無罪之使。其罪深矣。非爾國執政大臣來朝及歲貢如約。則不能免問罪之師。爾之所恃者滄海耳。不知滄海與吾共之。爾如不信。朕命舳艫千里。精兵數十萬揚帆東指。特問使者安在。雖不盡滅爾類。豈不俘囚其大半。爾果敢輕視乎。

○詔諭故元丞相哈剌章。蠻子。驢兒。納哈出等曰。自有元多事。群臣有棄君親而自苟全者。有抗朝命而自為者。目擊耳聞。實非一人。卿等獨奮忠仗義。衛君深塞。歲月如流。倏然十有一年。今聞爾君因疾而崩在。卿等可謂有始有終。良臣之名播矣。或聞欲立新君。其親王有三。卿等正在猶豫之間。此三人皆元之嫡派。卿等若欲堅忠貞之意。毋抑尊而扶卑。理應自長而至幼。無乃人倫正。天道順也歟。若有賢愚之別。禮難備拘。從賢則吉。夫當流離之際。而為臣者獨能竭力為之。不絕有元之祀。美聲盈人耳。豈不難哉。苟或不然。尊卑賢愚置之弗論。但以立君為名。而內自有專生殺之威。則非人臣之道矣。況同類頡頑。彼此疑猜。當此之際。卿等富貴若風中之燭。命如草杪之霜。深可慮也。

大明太祖聖神文武欽明啟運俊德成功統天大孝高皇帝寶錄卷之一百二十一

姚廣孝集卷一百五十一

明太祖實錄卷之一百二十二·洪武十二年正月至二月

洪武十二年春正月己巳朔。上御奉天殿受朝賀。大宴群臣。命婦朝皇后于坤寧宮。錫宴。

辛未。今上及周王橚。楚王楨。齊王樽自鳳陽來朝。賜其從官衛士鈔有差。

癸酉。旌表節婦九人。延平府順昌縣民蕭貢材妻顏氏。衢州府西安縣民楊智妻陳氏。紹興府上虞縣民柳宗遠妻唐氏。沂州剡城縣民傅十五妻王氏。濟寧府曹縣民許從政妻曹氏。武昌府江夏縣民曾養吾妻陳氏。重慶府巴縣民晏阿堂妻謝氏。永川縣民程鵬翔妻馬氏。太平府當塗縣民祖鼎四妻高氏俱蚤歲寡居。守節不貳。有司以聞。詔皆旌表其門。復其家。

乙亥。罷天下鹽運司批驗所。凡三十有二。

○初昏有星大如鷄子。西北行。二小星隨之。三丈餘而沒。

己卯。合祀天地於南郊大祀殿。命魏國公徐達及公侯等分獻日。月。星辰。嶽。鎮。海。瀆。山。川諸神。凡一十七壇。正殿三壇。昊天上帝。皇地祇壇。俱南向。仁祖配位壇。西向。丹陛之東為壇曰大明。西向。其西為壇曰夜明。東向。兩廡為壇各六。星辰之壇分設於東西。星辰之次東則太歲。次五嶽。次四海。西則風雲雷雨。次五鎮。次四瀆。天下山川神祇為壇二。分設於海瀆之次。各壇陳設仍舊儀。但仁祖配位玉用蒼璧。太歲。風。雲。雷。雨酒盞各十。東西廡各共設酒尊三。爵一十八於